



**Sud Bosne i Hercegovine**  
**Суд Босне и Херцеговине**

---

**Broj: S1 3 IŽ 043238 22 IŽ**  
**Sarajevo, 18.07.2022. godine**

Sud Bosne i Hercegovine u Sarajevu, u apelacionom vijeću sastavljenom od sudija Vesne Trifunović predsjednika vijeća, Dinke Bešlagić Čovrk i Mirko Božović članova vijeća, odlučujući o žalbi političke stranke Hrvatske republikanske stranke – HRS sa sjedištem u Mostaru, ulica Nikole Šubića Zrinskog br. 13, zastupana po Slavenu Ragužu, predsjednik stranke, izjavljenoj protiv odluke Centralne izborne komisije Bosne i Hercegovine broj: 05-01-07-6-1214/21 od 16.06.2022. godine, zbog kršenja Zakona o finansiranju političkih stranaka, u nejavnoj sjednici održanoj dana 18.07.2022. godine, donio je

**R J E Š E N J E**

Žalba se odbija.

**O b r a z l o Ź e n j e**

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je politička stranka Hrvatska republikanska stranka - HRS odgovorna što u 2019.godini :

- a) finasijska sredstva u iznosu od 25.612,95 KM utrošila bez programa utroška sredstava za 2019. godinu, čime je prekršila odredbe člana 4 stav 1 Zakona o finansiranju političkih stranaka
- b) nije vodila potpune evidencije o rashodima, i obavezama i nije popunila obrasce godišnjeg finasijskog izvješća za 2019. godinu u skladu sa Pravilnikom o godišnjem finasijskom izvještaju, čime je prekršila odredbe člana 11 stav 1 i člana 12 stav 1 i 4 Zakona o finansiranju političkih stranaka,

pa joj je na osnovu člana 15 stav 2 i primjenom člana 19 stav 1 tačka a), f) i h) Zakona o finansiranju političkih strankama izrečena :

- 1) za povredu iz stava 1. tačke a) novčana kazna u iznosu od 3.000,00 KM,
- 2) za povredu iz stava 1. tačke b) novčana kazna u iznosu od 1.500,00 KM, odnosno jedinstvena novčana kazna u iznosu od 4.500,00 KM.

Protiv ove odluke politička stranka Hrvatska republikanska stranka – HRS blagovremeno je uložila žalbu u kojoj je navela da u cijelosti osporava postojanje odgovornosti za kršenje odredbi Zakona o finansiranju političkih stranaka, da je ista nezakonita i nepravilna. Nije uzet u razmatranje dostavljeni program utroška sredstava. Naime, Program je sadržavao samo formalne nedostatke, zbog čega ga Centralna izborna komisija BiH nije mogla odbaciti. Transakcijski račun kod

Sparkasse bank d.d. BiH predstavlja predračun koji je služio za izborne aktivnosti za Opće izbore za 2018. godinu, i da je ugašen 08.01.2019. godine, te da time nije ništa iskazano osim što su sredstva prebačena na glavni račun. Prilog Ivana Džidića od 20,00 KM nije nepravilno podveden jer prilikom elektronskog podnošenja izvještaja nije postojao izbor koji bi podrazumijevao priloge niže od 100,00 KM, a prihod i proračuna Zapadnohercegovačke županije omaškom je pogrešno podveden. Osim toga, ova stranka nije imala nikakvog platnog prometa sa HNS-om, nije uplaćivala ništa na račun HNS-a, niti je dobivala ikakva sredstva od te institucije, a nije potpisivala ni bilo kakve ugovore o pristupanju HNS-u koji ni ne predstavlja politički subjekt.

Stoga predlažu da se žalba uvaži i da se ukine Odluka Centralne izborne komisije BiH i obustavi postupak utvrđivanja odgovornosti Hrvatske republikanske stranke.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbena odluka donesena na pravilna i potpun način u skladu sa zakonom i podzakonskim aktima.

Žalba nije osnovana.

Prema stanju u spisu predmeta, Centralna izborna komisija BiH je razmatrajući Preliminarni izvještaj službe za reviziju o pregledu godišnjeg finasijskog izvještaja za 2019. godinu političke stranke Hrvatske republikanske stranke broj 03-07-6-288/20 iz februara 2021. godine, utvrdila da je politička stranka prekršila odredbe Zakona o finasiranju političkih stranaka. Izvještaj je dostavljen političkoj stranci na izjašnjenje, koja se nije očitovala na Preliminarni izvještaj, nakon čega je Služba za reviziju, sačinila Konačni izvještaj o pregledu finasijskog izvještaja za 2019. godinu političke stranke Hrvatske republikanske stranke .

Navedeno je bilo osnov da Centralna izborna komisija BiH, po službenoj dužnosti, Zaključkom broj 05-1-07-6-1214/21 od 30.12.2021.godine, pokrene postupak utvrđivanja odgovornosti protiv žalitelja, zbog osnovane sumnje da je ova politička stranka u 2019.godini kršila odredbe Zakona o finasiranju političkih stranaka.

U postupku utvrđivanja odgovornosti, Centralna izborna komisija BiH je nakon uvida u Konačni izvještaj utvrdila da je politička stranka Hrvatska republikanska stranka finasijska sredstva u iznosu od 25.612,95 KM utrošila bez programa utroška sredstava za 2019. godinu, zatim nije vodila potpune evbidencije o rashodima i obavezama i nije popunila obrasce godišnjeg izvještaja, u skladu sa Zakonom o finansiranju političkih stranaka i Pravilnikom o godišnjim finasijskim izvještajima političkih stranaka.

Zakon o finasiranju političkih stranaka (Sl. glasnik BiH br. 95/12 sa izmjenama) u članu u članu 4 stav 1 propisuje obavezu političke stranke da finasijska sredstva može koristiti isključivo za ostvarivanje ciljeva utvrđenih programom i statutom.

Nadalje, članom 11. stav 1 i 12 stav 1. citiranog zakona politička stranka je dužna voditi poslovne knjige i podnositi finasijski izvještaj na način koji je utvrđen zakonom i drugim propisima, te voditi evidenciju o svojim prihodima i rashodima.

Iz stanja spisa, prema Konačnom izvještaju politička stranka Hrvatska republikanska stranka je iskazala režijsko-administrativne i ostale troškove odnosno ukupne rashode u iznosu od 25.612,95 KM. Međutim, iz Programa utroška sredstava za 2019. godinu koji je dostavljen Centralnoj izbornoj komisiji tek u 2021. godini proizilazi da je stranka planirala rashode u ukupnom iznosu od 3.070,00 KM, ali kako program ne sadrži bitne elemente a to je datum usvajanja, nije potpisan od odvalštenog lica, to isti nije ni razmatran od strane Centralne izborne komisije BiH.

Dakle, prema konačnom izvještaju utvrđeno je da žalitelj sredstva u iznosu od 25.612,95 KM utrošio bez programa utroška sredstava za 2019. godinu

Da nije vodila potpunu evidenciju, proizilazi iz dokaza koji je izvršen uvidom u transakcijski račun koji je stranka imala otvoren kod Sparkasse banke d.d. BiH i na kojem je istog dana kada je i ugašen 08.01.2019. godine, ostvaren promet tako što su na taj račun uplaćena sredstva u iznosu od 9.998,00 KM. Dakle, nije prijavljen transakcijski račun i ostvareni promet.

Prihode ostvarene iz budžeta Zapadnohercegovačkog kantona u iznosu od 16.200,00 KM stranka je iskazala kao prihode iz budžeta Grada Ljubuški, što žalbom i ne osporava, pa taj prekršaj ne može opravdati ni navod žalbe da je greškom upisano.

Troškove zakupa iskazani u poslovnim knjigama u iznosu od 2.800,00 KM, prikazani su u manjem iznosu od 700,00 KM od evidentiranog, jer je stranka koristila u zakup poslovni prostor od 42 m<sup>2</sup> uz godišnji zakup od 2.400,00 KM i podrumске prostorije površine 15 m<sup>2</sup> za koji je plaćan zakup od 1.100,00 KM.

Isto se odnosi i na rashode iz ranijih godina za koje tvrdi da ih je ostvarila u iznosu od 25.612,95 KM, jer je Služba za reviziju uporedila troškove evidentirane u poslovnim knjigama na kontu rashoda sa planiranim troškovima koji su evidentirani u finansijskom planu za 2019. godinu, i utvrdila da je politička stranka planirala rashode u iznosu od 3.070,00 KM, da program ne sadrži datum usvajanja, niti je potpisan od strane ovlaštenog lica, zbog čega nije ni uzet u razmatranje.

Pravilno je odmjerena i novčana kazna imajući u vidu da je Centralna izborna komisija BiH kao olakšavajuću okolnost cijenila činjenicu da politička Hrvatska republikanska stranka do sada nije kažnjavana zbog kršenja odredbi Zakona o finansiranjima, zatim ekonomsko stanje stranke, zatim je cijenila da žalitelj prema podacima iz godišnjeg finansijskog izvještaja za 2019. godinu u toj godini ostvarila prihod od 43.700,00 KM.

Dakle, činjenice na kojima se zasniva utvrđenje odgovornosti proizilaze iz stanja spisa i primjenjivih odredbi Zakona o finansiranjima političkih partija. Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA  
S U D I J A**

**Vesna Trifunović**